

সুপ্রিয় ফণী
এ সময় ...

ভেঙে যাচ্ছে প্রিয় শব্দগুলো
ভেঙে যাচ্ছে মুগ্ধ রূপকথা
ভেসে যাচ্ছে স্রোতের খর টানে
জমানো গান, জমিয়ে রাখা ধূলো।

ভেঙে পড়ছে আষাঢ় বা শ্রাবন
মুছে যাচ্ছে আমার হাতে লেখা —
কে কার সাথে ... কারা কতক্ষন...
ভাঙন বিধি, যাবৎ রূপরেখা ॥

আমি তো আছি বান্দা বিন্দাস্
বুরি নজরওয়ালের মুহূঁ কালা —
ভেঙে যাওয়ার বিবর্তন থেকে
উঠে আসছে আমার জপমালা ॥

কানহা-য়

এখানে বসতি শেষ, এইখানে জঙ্গলের শুরু,
বাংলোর অদূরে মাঠ, বড় ঘাস, পা-ফেলা নিষেধ —
সেখানে হলুদ-কালো বিদ্যুৎ ঝলসে ওঠে গাঢ়,
হাওয়া ঘুরে গেলে প'র, অনুকম্পা মেখে
হরিণের রক্ত আর জ্যোৎস্না এসে মুখোমুখি বসে...

নিষেধের গল্প বলে বুড়ো শাল, চকিত ময়ূর —
হরিণ হরিণ খেলা — মনে পড়ে ঈষৎ আমারও ॥